




## PLAID SIN VIA

La stad ei avon porta cun bia caschuns da guder, mirar e scuvrir. Nus essan loschs che l'organisaziun Pro Cap Grischun renconuscha nos sforzs che era persunas cun impediments san far quei. Il premi d'inclusiun rinforza nus da cuntinuar quei engaschi. Era la Spitex Selva ha in grond engaschi, uonn festivescha ella siu giubileum da 25 onns. Visitei il stan giubilar cu la spitex seprenta a Laax. Aunc in giubileum dat ei uonn: La pleiv catolica da Laax commemorescha siu anniversari da 500 onns. Legi dapli da quei «vult» anniversari en quell'ediziun dallas Novas da Laax. Jeu giavischel a Vus ina buna entschatta dalla stad en nossa veglia mo aunc adina dinamica vischnaunca. Cun salids da stad

Franz Gschwend, president communal



Il document dils 20 d'uost 1525 che conferma l'installaziun dalla atgna pleiv da Laax.

# 500 ONNS PLEIV CATOLICA LAAX



Cun quei link vegnis Vu stier las Novas da Laax en tudestg e romontsch.

## IMPRESSUM:

Novas da Laax, Vischnaunca Laax  
Cumpara: mintga 2 meins  
**Proxima ediziun: 25 da fanadur 2025**  
**Ideas per tematicas: tochen ils 11 da fanadur 2025**  
Redacziun: Domenica Flütsch  
Contact: admin@laax-gr.ch

**Survetsch divin festiv, program per affons, ina discussiun al podium ed ina exposiziun el museum stattan sil program digl onn giubilar «500 onns pleiv catolica Laax» 1525-2025.**

Tochen l'entschatta dil 14avel tschentanner era Laax ina «filiala» dalla pleiv da Sagogn. Pli e pli ha la vischnaunca insistiu da daventar independenta, aschia ch'igl uestg Paul Ziegler da Cuera ha finalmein consentiu ils 20 d'uost 1525 al giavisch d'installar ina atgna pleiv. Sin in agen plevon ha Laax denton aunc stuii spitgar pli che 100 onns: ils embrugls che regevan durent il temps dalla reformaziun, la munconza da spirituals e la precara situaziun finanziaria dalla vischnaunca han impediù l'indipendenza immediata. 1632 eis ei il mument denton arrivaus, e pader Joannes Maria de Poschiavo priu domicil sco emprem plevon ella casa pervenda ch'era vegnida construida paucs onns avon a Laax. In ulteriur punct culminont ha la pleiv contonschiu 1677 cun la consecraziun dalla nova baselgia, baghegiada sin ils fundaments dil vegl sanctuari gotic.

## Sfidas en temps pretensius

Cun mirar sigl avegnir dalla pleiv stat l'actuala cuminonza religiosa avon ina retscha da sfidas. Quei pertucca ton la dimensiun religiosa, spirituala e la cardientscha vivida ella pratica, buca meins denton era aspects organisatorics e dalla societad sco tala. Igl onn giubilar duei perquei vegnir nezegiaus per s'occupar dalla historia, denton era da s'occupar a moda accentuada cun

## NUS DUVREIN VIES AGID!

Per documentar il vargau dalla pleiv da Laax vegnan tschercadas fotografias da fistas da baselgia dils davos 100 onns: Batten, nozzas, sepulturas, processions, survetschs divins alpesters, perdanonzas e.a.v. Las fotos vegnan duvradas per l'exposiziun el museum, per las occurrenzas en baselgia e per ina publicaziun en regurdientscha digl onn giubilar. Las fotos san vegnir dadas giu en casa pervenda ni tarmessas en fuorma digitala a secretariat@pleiv-laax-falera.ch

# NOVAS DA LAAX

Zweimonatliches Informationsbulletin mit Aktuellem aus Verwaltung und Vereinen



*Laax, all'entschatta dil davos tschentaner, cun la baselgia parochiala dedicata a s. Gagl e s. Othmar.*

damondas dil futur. Tematisadas vegnan differentas perspectivas, basegens e spetgas da parochianas e parochians. Pretensiua vegn ad esser la sfida da mantener ils fundaments da nossa cardientscha e las tradiziuns dalla baselgia en in contornologic e demografic ch'ei sutta-mess a midadas permanentas, e quei aschia ch'il carstgaun dad oz capescha quei.

Ils maletgs exteriurs ein evidents: durant survetschs divins ed autras fuormas da liturgia ein las baselgias vitas. La practica religiosa visibla ei ton sco svanida ord la veta publica dalla Surselva. Ductrina el senn da catechesa ed entruidament ella cardientscha ei per affons ed instruidras ed instruiders savens plitost in stuer ch'in

vuler. Ei quella descripziun memia negativa? La pleiv roman-catolica da Laax pren la caschun da siu 500avel onn d'existenza da buca mo mirar anavos, mobein da ponderar e reflectar damondas digl avegnir religios en in contex totalmein semidaus durant ils davos decennis. Il podium dat la caschun d'endriescher digl uestg diocesan Joseph Maria Bonnemain, dalla muniessa Monica Huppi OP, da Marion Hilber, responsabla per l'instrucziun da relegiun dalla Baselia catolica dil Grischun e dil teolog, assistent scientific alla Scola aulta da teologia a Cuera e spiritual da festival voluntari Claude Bachmann lur perspectiv per dar novs impuls alla veta da cardientscha. La discussiun vegn moderada da Mariano Tschuor.

Bugen envidein nus vus da participar e da silsunter cuntinuar las discussiuns durant igl apéro.

## PROGRAM ONN GIUBILAR

**Du 22-6 Museum:** Avertura dalla exposiziun «Detgas, zenns e sgaras» Durant la stad sededichescha il museum en ina exposiziun speciala alla baselgia, detgas e tradiziuns ella regiun da Laax.

**So 16-8 Baselia:** Program per famiglias / Historia ed historias

Durant il di giugs e divertiment per l'entira famiglia e la sera dein nus in'egliada en la(s) historia(s) dils davos tschentaners e schein vegnir a plaid actualAs ed anteriurAs collaboraturAs e funcziunariAs dalla pleiv. Silsunter eis ei pusseivel da schar reviver las atgnas historias durant il Café nocturn el museum.

**Du 17-8 Baselia:** Survetsch divin festiv cun uestg Joseph Maria Bonnemain Bunamein sil di 500 onns suenter la fundaziun dalla pleiv festivescha nossa cuminonza ensemen cun igl uestg da Cuera in survetsch divin da giubileum. Silsunter apéro rich ella Sentupada.

**Ve 21-11 Aula:** Discussiun al podium «Surselva, tiara dalla missiun – ha la cardientscha cristiana aunc in avegnir cheu tier nus?»

Il program da detagl vegn actualisau cuntinuadamein sin la pagina d'internet dalla pleiv.

## ENCURETG: VOLUNTARIS PER LA FIASTA D'AFFONS LAAX

La fin d'jamna dils 19 e 20 da fenadur ei puspei entuorn il Lag Grond la renomada fiasta d'affons. Varga 40 attracziuns envidan da termagliar, zambergiar e scuvierer. Per che quella fiasta tradiziunala d'affons. Per che l'enconuschenta occurrenza populara da stad funcziuni senza problems enquera il comite d'organisaziun gidontras e gidonters che sustegnan el.

Seigi per assister e mirar dils affons, agid en cuschina ni survigliar ils divers posts – per scadina voluntaria e scadin voluntari dat ei in pensum adattau. Gl'engaschi entschiva allas 8.15 al Lag Grond e sa esser presents per in ni per dus dis. Ils gidonters han dabien in proviant gratuit ed els vegnan envidai, sco engraziament, alla party

dils voluntaris. Quella ei il meins d'uost ed ei cumbinada cun ina buna tscheina ed in program da divertiment. La pli gronda paga pigl agid ei denton il rir e surir dils affons che astgan passentar uras nunemblideivlas alla fiasta d'affons a Laax.

La fiasta ei naschida avon varga 20 onns ed ei restada tochen oz in'occurrenza senza profit. Pusseivla eis ella mo grazia ad enorm bia lavur da voluntaris e sustegn finanziar da sponsurs. Tgi che vul far part da quell'experiencescha speciala, sa s'annunziar sco voluntari tier l'adressa voluntaris@kinderfest-laax.ch.

**Dapli informaziuns:**  
kinderfest-laax.ch, voluntaris@kinderfest-laax.ch



*Fiasta d'affons Laax encuera gidontras/gidonters.*



## 25 ONNS SPITEX SELVA – SUCCESS DALLA TURNEA GIUBILARA



Impressiuns dalla turnea dalla SpiteX.



Foto SpiteX Selva

### AGENDA

**Sonda, 31 da matg / dumengia,  
1 da zercladur 2025**  
**Concert – Chor viril Laax e Chor viril Falera**  
31-5. allas 20.00, La fermata Falera  
1-6 allas 17.30, Aula Grava Laax

**Sonda, 7 da zercladur 2025**  
**Uniun da giuventetgna: DISCO cun Oldies Bar**  
Aula casa da scola

**Venderdis, 13 da zercladur 2025**  
**Fundaziun Pro Laax – concert dalla Scola da musica Surselva**  
allas 18.30, Aula casa da scola

**Sonda, 14 da zercladur 2025**  
**Apero da beinvegni per novas  
habitontas e habitonts**  
allas 16.00 Uhr, Cularta

**Venderdis, 27. Juni 2025**  
**Café nocturn - Museum Laax**  
allas 18.00, el museum

**Gievgia, 10 da fenadur 2025**  
**Museum Laax – guidada tras Laax**  
allas 14.00, liug da s'entupar: parcadi spel  
Lag Grond, annunzias tochen las 12.00.

**Dumengia, 13 da fenadur 2025**  
**Messa alpestra a Nagens**

**Sonda e dumengia, 19 e 20 da fenadur 2025**  
**Fiesta d'affons**  
10.00 – 16.45, Lag Grond

Las jamnas vargadas ei la SpiteX Selva se-presentada a sis occurrenzas giubilaras el-las vischnauncas Trin, Flem, Sagogn, Laax, Falera e Schluein. Quellas han dau caschun da vegnir en contact culla populaziun, da presentar la purschida e da far in viva sil giubileum da 25 onns. Els loghens d'acziun han las visitadras ed ils visitaders astgau seschar mesirar gratuitamein la pressiu e las valurs dil saun e separticipar ad ina concurrenza interessanta, plinavon ha l'organisaziun purschiu spisa e bubronda ed envidau da seser pacific e da vegnir en discussiun. Ils resuns sin quella turnea giubilara ei stada atras atras positiva. Numerusa glieud ha mussau grond interess pils survetschs dalla spitex, han fatg damondas e nezegiau la pusseivladad da discuorer directamein cullas collaboraturas. Talas sentupadas persunalas accentueschan la valor e l'attaschonza che la SpiteX Selva survegn ella regiun.

## LAAX SURVEGN IL PREMI INCLUSIUN DALLA PROCAP GRISCHUN 2025

A caschun dalla radunonza generala dalla Procap Grischun la fin da mars 2025 a Claustera ha il president communal da Laax Franz Gschwend retschert per sia vischnaunca il Premi Inclusiun 2025. Procap Grischun undrescha cunquai la vischnaunca da Laax per ses sforzs d'eliminar el spazi public las barrieras architectonicas e promover la libertad da semover da persunas cun impediments.



Inklusionspreis 2025 in der Cularta